

11 NOV 1998

APEC-BERITA-PERBINCANGAN/I

MALAYSIA NAFI MINTA PERBINCANGAN DUAHALA DENGAN KANADA

Oleh: Ahmad Fuad Yahya

KUALA LUMPUR, 11 Nov (Bernama) -- Kementerian Luar Malaysia telah menafikan ia meminta diadakan pertemuan rasmi dua hala antara Perdana Menteri Datuk Seri Dr Mahathir Mohamad dan rakan sejawatannya dari Kanada, Jean Chretien, semasa Sidang Kemunjak Apec di sini minggu depan.

Menurut kementerian itu dalam kenyataannya hari ini, kerajaan Malaysia tidak membuat sebarang permintaan bagi pertemuan itu diadakan antara kedua-dua perdana menteri itu semasa sidang kemunjak pada Selasa dan Rabu.

Kementerian itu membetulkan laporan akhbar "The Star" Ahad lepas yang menyatakan Kanada menolak permintaan Malaysia bagi pertemuan rasmi antara Dr Mahathir dan Chretien semasa sidang kemunjak itu.

Menurut kenyataan itu, pertemuan kedua-dua pemimpin itu diatur sejajar dengan amalan Apec yang menyediakan peluang bagi pertemuan antara pengerusi sidang kemunjak tahun ini dan tahun lepas.

"Pertemuan itu dicadangkan untuk membincangkan susulan kepada isu-isu Apec yang dipersetujui tahun sebelumnya.

"Amalan ini diharapkan dapat memberikan kesinambungan dalam proses Apec," katanya.

Oleh itu, persoalan Kanada menolak permintaan Malaysia bagi diadakan pertemuan rasmi dua hala antara Dr Mahathir dan Chretien tidak timbul, tambahnya.

-- BERNAMA

AFY JR MA